

**Godin Akam Inigha Izir  
 Gumazim  
 Nahumin Akinafarim  
 O  
 Nahum  
 Akar faragha zuim**

Godin akam inigha izir gumazim Nahum, e deraviram an ikirimirim gifozir puvati. Niniven nguibar ekiam a ikuvigha gifä, kamaghin amizi, akinafarir an osirizir kam, kar an migirigar bar akongeziba.

Ninive, a kantri Asirian nguibar ekiam. Asiria a kantrin bar gavgavir mam, ezi an midorozir gumaziba kantrin igharazir aviribar gumazamizibav sogha me abini. Kantrin kamra notin amadaghan Israelian kantri gasighasiki. Egha an gumazamiziba inigha ghuezzi, me danganir igharazibar iti.

Kamaghin amizi, Israelia orazi apaniba Niniven nguibar ekiam gasighasighizi, me bar akonge. Godin akam inigha izir gumazim Nahum kamaghin migei, me akaba batogha arazir kurar avirim gami. Kamaghin amizi, God men arazir kuraba ikarvagha uabi bizir kam gamizi, a Ninive bato.

**Ikiavira Itir God Niniven nguibar  
 ekiam gasighasiki**

*(Sapta 1-3)*

*Ikiavira Itir God Niniven nguibar ekiamin aningazi*

<sup>1</sup> Godin akam inigha izir gumazim Nahum, a irebamın min garir bizir mamin garima, God akar kam a ganıngizi, an akınafarir kam osiri. Akar kam, a Niniven nguibar ekiamin akam. Godin akam inigha izir gumazim Nahum, an nguibam Elkos.

<sup>2</sup> Ikiavira Itir God uabıra God, a gumazamiziba ateghti,  
me asebar ziaba fan kogham.

An akam batozir gumazamiziba, a  
mızazim me ganıdi.

Ikiavira Itir God, a uan apanibar aningagha,  
men arazir kuraba ikarvagha iveauzir kuram  
me ganıdi.

<sup>3</sup> Ikiavira Itir God a zuamıram atarir puvatı.  
A Godin Gavgavir Ekiaba Itim,  
egha a zurara arazir kurabagh amir gu-  
mazamiziba mızazim me gasi.

Ikiavira Itir God, danganir manamın mangiti,  
amınır ekiam ko amozim otivam,  
eghti ghuariaba mati an dagarimning  
nguazim ditima,  
nguazim mineziba mizi.

<sup>4</sup> An ongarim dagarvagh an atarti, ongarim  
dakegham.  
Egha uaghan fanebagh ami da dati.

---

**1:1:** Aisaia 10:5-34; 14:24-27; Sefanaia 2:13-15    **1:2:** Ua Me Ini 20:5; Godin Araziba 32:35; 32:41; Onger Akaba 94:1    **1:3:** Ua Me Ini 34:6-7; Onger Akaba 104:3; Aisaia 29:6; Amos 1:14

- Egh a suam, biziba ikuvigham,  
     eghti azeniba ko, grazir aghuariba misingigh  
         arimighiregham.
- Basanin nguazir aghuimin itir azeniba ko,  
     Karmelin Mighsiamin itir temeba  
         ko, Lebanonin kantrin itir akimariba, da bar  
         midiava ariaghiri.
- <sup>5</sup> God uan gavgavim akazi, mighsiaba agoa nigha,  
     dipabar min otifi.
- A uan gavgavim akazi, mikimkizim nguazim gi-  
     nobagha a gamima a nisi,  
         ezzi gumazamiziba uaghan agoa nisi.
- <sup>6</sup> An aningazir dughiam, tina deravira iki iku-  
     vighan kogham.  
         Bar puvatigham.
- A gumazamizibar aningagha, an damazimning  
     mati avim isiava aghefe,  
         An aningagharim, dagiaba misaragharsi.
- <sup>7</sup> Ikiavira Itir God, an arazir aghuibal e gami.  
     Osimtizibar dughiabar a uan gumazamizibar  
         mogomer danganimin min ikia,  
         egha gumazamizir a bagha zuiba, a men  
         akurvasi.
- <sup>8</sup> An aperiar ekiamin min, Niniven nguibar ekiam  
     bar a gasighasigham.  
         Egha gumazir an akam batoziba, a me misozi  
         me ariaghiri.
- <sup>9</sup> Ia apaniba, ia arazir manam Ikiavira Itir God  
     damuasava a migei?  
         Ia ganigh, a bar ia kuavaremegham.

Guizbangira, apanitam dughiar  
pumuning akirim ragh a gasaraghan  
kogham.

**10** Ia mati gumazim dipar organim amegha bar  
ongani,

eghti a bar ia agivagham,  
mati avim benir dikoniba ko, grazir bar  
misingizibar isi.\*

**11** Ia Niniven adarasi, ian mav nighnizir kuram iti,  
egha a pazi Ikiavira Itir God damuasa akam  
akiri.

**12** Ezı Ikiavira Itir God uan gumazamiziba Israelia,  
a kamaghın me migei,

“Asiriaba me bar avırasemegha gumazir gavgav-  
iba iti,

ezı ki me gasighasichtı, me bar givagham.

Nan gumazamiziba, ki osimtizir ekiam ia gati,  
egh ki ua kamaghın damuan kogham.

Bar puvatıgham.

**13** Asiriaba faragha ia gativagha ike,

ezı datırıghın ki men gavgavim abıragham,  
eghti me ua ia gativagh, ian ganan kogham.

Eghtı ia ua men kalabusın aven ikian  
kogham.”

**14** Egha Ikiavira Itir God Akar Gavgavimın kam-  
aghın Asiriabav gei,

“Ian ovavir boriba uam otivan kogham.  
Ian dipenir asebar ziaba feba,

\* **1:10:** Hibrun akamın me kagh akam deragha anebighizir  
puvati.

ki dar aven marvir guaba bar dagħ  
asighasigham.

Egh me ian kuaba afamin moziba, ki ia bagħ dar  
akīram.

Ia gumazamizir kiniба, kamaghin amizi, ia ua  
ikian kogħam.”

**15** Ia gan, gumazir mam mighsiamin itir tuavim in  
izi,  
egħha akar aghju im inigha izi.

Kamaghin amizi, ia Judan gumazamiziba, ia izi  
uari akuvagh Ikiavira Itir Godin ziam fis-i isam  
damuam.

Egh bizir ia God daningasa akam akirigha  
givaziba,  
ia da isi a daning.

Egħiġi gumazamizir kuraba ua ian nguazim inian  
kogħam.

Guizbangira, God me gasighasigha gifa.

## 2

**1-2** Apaniba faragħa Israelia gasighasigha, men  
biziba bar da inigha ghue.

Ez-zi datirighin Ikiavira Itir God, Israelin ziar  
ekiam damut,  
a faragħa ikeżi mogħin uam otivam.

O Niniven adarasi, apaniba datirighin ia misosi.  
Ia gasighasighamin gumazim izegħha gifa.

Ia midorozir gumaziba arighti me ian nguibar  
ekiam in okarigham.

Ia bar deravira tuavibar gan.

Ia misoghsı tuivigh gavgavigh gan.

*Ninive ikuvigham*

**3** Ian apaniba orar aghevibar suigha, m̄idorozir korotiar agheviba aghuigha,  
ia misoghsa izi.

Me misoghsa ivemara izima, men karisba taghtasi,  
mati avim isi.

Ezi men afuzir ruarir me painin temebar ingariziba,  
da misoghsa amua dar koniba igha izi.

**4** Men karisba bar pamten ivemara nguibar ekiamin aven izi,  
egha gumazamiziba uari akuvir danganibar  
me dar mangi izegħi gami.

Me adenir avibar min isia,  
tintinibar ghua mati onimarim tagħtasi.

**5** Men faragħha zuir gumazim, m̄idorozir gumazir  
dapanibar diazi,  
me ivemara asaghpora irasava amua divazim  
bagħha zui.

Me zuamira ivemara ghua averpenim in aven zui,  
me averpenim in apengan, divazim ginivti,  
anekaramin temer otevir mam iti.

**6** Me temer otevir kam, tiar akar fanemin  
boroghin itim ginivima,  
tiar akam akariaghiri.

Ezi dipam bar puvira ivemara, atrivimin  
dipenim in aven izima, aperiar ekiam otozi,  
gumazamizir atrivimin dipenim in itiba bar  
atiatingi.

**7** Apaniba Asirian atrivim gamizi, a tughav itima,  
me an amuimin korotiaba suegha,

a inigha kalabusin ghu.  
 Ez̄i an ingangarir amizibar naviba bar ikuviz̄i me  
 aziava,  
 bar an apangkuvigha uan evaribav sosi.

**8** Dughiar bar ruarin̄in Niniven nguibar ekiam  
 nimira iti, mati dipar akarem.  
 Ez̄i datirighin an gumazamiziba ara nguibar  
 ekiam ategha azenan zui,  
 mati dipam apirizir divazim  
 akariaghiri, dipam puv̄ra ivemari.  
 Men marazi pamten dia ghaze,  
 “Ia mitifigh, ia mitifigh. Ia ari mangan marki.”  
 Ez̄i tav mitigha uamategha zuir puvati.  
 Bar puvati.

**9** An apaniba kamaghin uan adaraziv gei,  
 “Aria, ia men gol ko silvaba okemegh bar da inigh.  
 Bizir aghuir bar aviriba, men nguibar ekiam  
 gizifa.”

**10** Ninive bar ikuvigha, pura danganir kinir gu-  
 mazamiziba puvatizim̄in min iti.  
 Gumazamiziba nguibar ekiam ategha tintini-  
 bar are.  
 Me puviram aguava bar atiatigha, men suerogho-  
 fariba nisi.  
 Men gavgaviba bar givazima, men naviba me  
 ḡiaghaghirma,  
 men damaziba atiaghiregha guaba bar  
 ghuari.  
**11-12** Nguibar ekiar kam faragha bar gavgafi,  
 mati laionba itir danganim, ez̄i datirighin pu-  
 vati.

Ninive fomira mati laionin igiaba ikia apir danganim, ezi laionin apuriba ko, amebaba ko, men nguziba an moga deravira itima, apaniba me misozir puvati.

Laionin apurim asizibav sogh da nguemsirighti, amebam ko, nguziba deravira damam.  
Egha asizir naba isa dipenim garizima a izifa.  
Ezi datirighin laionin dipenim a managh iti?  
A ikuvigha gifā.

<sup>13</sup> Ikiavira Itir Godin Gavgaviba Bar Itim kamaghin Ninivebav gei,

“Kirara ian apanim.

Ki ian karisba dapongti da bar isigham.  
Egħti ian midorozir gumaziba,  
laionin igiabar minn midorozimin aven arimighiregham.

Egħti bizir ia igharaz darazi da iniziba, ki bar uam ada inigham.

Egħti Kantrin Igharazibar Gumazamiziba  
ua ian abuir gumaziba baragħan kogħam.”

### 3

<sup>1</sup> O Ninive! Men gumazamiziba puvira ifara gumazamizibav sozi me ariaghiri.

Egha bizir avirim okemegħha, nguibar ekiam garizima a bar izifa.

Kamaghin amizi, God gumazamizir kaba bar me gasighasigham.

Mevzika!

**2** Ia oragh, benir hoziabar akiriba ifozorozim ikia tingazi,  
ez̄i hoziabar sueba ko, karis̄in wilba tuavimin tingazi.

Ez̄i karisba tuavimin dagiabagh isin ghua nidi.

**3** Midorozir gumaziba hoziabagh apiagha ivermara izi,  
ez̄i men midorozir sababa glas̄in min taghtasi.  
Egha gumazir av̄irim misozima, men kuaba tintinibar uarigh isin irav iti,  
ez̄i ni da diponan iburaghām.

Ez̄i gumazamiziba aruava gumazir kuaba dika, me gasaghporaghiri.

**4** O Ninive, ni mati tuavimin amizim, kamaghin amizi, God iveauzir kuram ni ganidi.

Nin ganganim bar derazi, ni kantrin igharazibagh etui,

mati tuavimin amizim akavsiaba ko, imezibagh amua gumazibagh etui.

Kantrin Igharazibar Gumazamiziba ni bagha ghua tuavimin amizim min ni ko, arazir kurabagh ami.

Egha me nin kalabuziar gumazamizibar min iti.

**5** Ez̄i Ikiavira Itir Godin Gavgaviba Bar Itim kamaghin migei,

“O Ninive, ki ni gasighasigham.

Ni tuavimin amizimin min itima, ki datirighin nin korotiaba sueghti ni bibiamra ikiam.

Ni korotiaba puvatighti, Kantrin Igharazibar Gu-mazamiziba nin ganti,

ni bar aghumsigham.

**6** Ki pazi ni damuva, bizir mughuriar kuraba zuibar ni avaraghram.

Egħiġi Kantrin Igharazibar Gumazamiziba nın ganiva bar atiatigham.

**7** Me nın ganiva nın arı mīriabar mangam.

Me kamagħin mikim suam,

Ia gan. Ninive ikuvigha gifa.

Gumazitam an apangkuvighan kogħam.

Migirigħiar aghuaritam a damuva an akur-vagħamin gumaziba puvati.”

**8** O Ninive, ni ti ghaze, nın gavgavim Tebes gafira, a?

Kar Isipin nguibar ekiar mam.

A uaghan Nailin Faner Ekiamin borogħiñ iti, eżi Nail mati an divazim.

**9** Ia ti fo, Tebes, kantri Isip ko, kantri Itiopian ruaghatevir mam gativagħha aningin gari.

Eżi kantrin tam an gavgavim abirazir puvati. Eżi kantri Put ko, kantri Libia a ko, porogħa midorozibagh ami.

**10** Eżi a pura bizim, apaniba Tebesia gafirragħa, kalabusin ingangarim bagħha me inigha ghue.

Me men boriba, tuavir akar uari bat-tivbar me misozi me ariaghiri.

Egha Tebesin gumazir aruaba me senbar me ikegħha vagħvagħha me inigha ghue, eżi me men ingangarir gumazir kienibar minn ingari.

**11** Ia Niniveba, ia uaghan Tebesbar minn otivam.

- Ia dipar onganibar ami gumazir onganibar  
min otivam.
- Ian nighniziba onganighti ia daighiram,  
egh apanibar atiating arı mangi mongsı dan-  
ganiba buriam.
- 12** Eghti apaniba ian nguibal ekiam inisi pamten  
ingaran kogham. Puvatigham.
- Ian nguibal ekiar gavgaviba mati fighin  
temer oviziba faragha anigha gifa.
- Eghti apaniba zuamiram a inigham, mati gu-  
mazim temer figh ginobazi,  
an oviziba ira gumazimin akatorimra iraghu.
- 13** Ian midorozir gumaziba mati amiziba,  
kamaghin amizi, me apanibav sogh, me bat-  
ueghan kogham.
- Ian nguibal ekiamin tiar akar ekiar, gavgav-  
iba apazir igugunir gavgaviba, avim dar  
isigham.
- Eghti nguibal ekiamin tiar akam bar  
kuighirighti, apaniba puram an aven  
izegham.
- 14** Niniven gumazamiziba, apaniba ian nguibal  
ekiam korogham,  
kamaghin amizi, ia dipaba tuigh, da inigh  
nguibal ekiamin aven izi.
- Egh ia nguazir aghevim inigh a dikiti an  
ameregħti,  
ia brighbar ingarir boksiabar arīgh.
- Egh brighba inigh mangi  
gavgavim isi nguibal ekiamin dīvazim  
daning.
- 15** Ia dar amuti da uaghan bar ian akuraghan  
kogham.

Avim izi ia ko ian nguibar ekiamin isiti, ia  
 isigh arighiregh bar givagham,  
 mati odeziba bar dagheba agifa.  
 Ia faragha odezibar min bar aviraseme.

**16** Egha ian gumazir dagiar ingangaribagh amiba  
 bar avirasemegha, overiamin mikovezibar  
 dibobonim gafira.

Ezi datirighin me bar ghuegha gifa,  
 mati odeziba zuravariba amegha givagha,  
 uan aviziba kuigha mighegha ghue.

**17** Ian gumazir dapaniba mati odezir okoruam,  
 orangtizimin dughiam,  
 da divazibagh isin iti.

Ezi aruem anadima da migha ghue.

Ezi gumazamiziba fozir puvati, da managh  
 ghue?

**18** O Asirian atrivim, ni oragh.

Nin gumazir dapaniba ko, gumazir ziaba  
 itiba,  
 me ariaghirezi men kuaba ireghav iti.

Ezi apaniba nin gumazamizibagh amizi, me tin-  
 tinibar mighsiabar ghue.

Ezi ua men akuva, me inigh nguibamin iza-  
 min gumaziba puvati.

**19** Ni mati gumazir duar ogorim iti.

Ezi nin duam damighti an akumamin maras-  
 inba puvati.

Nin duam akumighan kogham.  
 Bar puvati.

Ni fomira paza gumazir aviribagh ami,

ezi gumazitam arazir bar kurar ni me gami-  
tamin arî mangighan kogham.  
Kamaghin amizi, gumazamiziba nin osimtizim  
bareghîva,  
dafaribav sogh bar akuegham.

**Godin Eghaghanim: Akar Gavgavir Dikirizir  
Ghurim ko Igiam  
The Holy Bible in the Aruamu language of Madang  
Province, Papua New Guinea, 2020 Edition  
Buk Baibel long tokples Aruamu long Madang Provins  
long Niugini long 2020**

copyright © 2020 Pioneer Bible Translators

Language: Aruamu

Translation by: Pioneer Bible Translators

Contributor: The Seed Company

GOD'S STORY in the Aruamu Language of Papua New Guinea

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

---

PDF generated using Haiola and XeLaTeX on 11 Nov 2022 from source files dated 29 Jan 2022

8f6beb37-6783-55d5-91ed-8321cc3f5eea